Da poi disnar fo Consejo di X con la zonta, et fonno spazati do padoani erano retenuti de qui et uno trevixan, che siano cavati fuora et si apresentino ogni di come li altri.

Fu posto parte e presa di vender certi gotoni di Cypri di raxon di la Signoria nostra ut in parte, per ducati . . . . milia a li Pixani dal bancho, i qualli farano la dita al tempo e darano certi contadi, et vengino de qui con nave senza pagar nollo ni dazio.

Fu posto parte di debitori et darne 50 su polize a li capetani et admonirli a pagar termine 8 zorni aliter sieno retenuti e toltoli li pegni di caxa etc. ut in parte, videlicet a li debitori di tanxe et decime.

Di Chioza, di sier Alvise Barbaro, pagador al armamento. Fo lettere. Qual andò lì con danari per dar sovenzion a la galia Capella, scrive come à comenzà a dar danari, sichè la expedirà.

152 \* Relatione leta in questo Consejo di X, ozi, di Gabriel Pinello, zenoese, stato a Zenoa et tornato, fata a li capi di X.

> Come è stato a Zenoa questa setimana passà e le feste di pasqua et non vide armada alcuna, e 8 di fa ch' el parti, ne in Provenza si fa preparation di armada, è in porto di Zenoa una nave del gran maistro ben in hordine di artellarie ma non di zente, de portà de cantera 12 milia, è Prejam con 10 galie armate a Marseja per forza, nel qual numero era le vechie, e lì a Zenoa se dicea il papa era con la Signoria, perhò 25 in 30 di Fregosi partino de Zenoa per andar a Roma da missier Otavian di Campofregoso, et il governator francese fe' comandamento che in pena di la forcha niun partisse senza licentia dil palazo e niun in Zenoa recetasse zente forestiere in caxa. Item, intese passava zente francese per la Lombardia 7 in 8 milia fanti guasconi; et si parti di Zenoa e vene a Pavia, vide le zente e capi numero 400 guasconi, lo resto dil Dolfinà e savogini e piamontesi, numero 2500: tutti non havea lanzon, chi avea spada, e mal in hordine erano alozati a li borgi a descrition. Fo 8 di poi pasqua, che per una femena publicha veneno a le man pavesi tra lhoro, e fo tajata, feriti da persone 150 di la terra, morti 4 scolari sopra il ponte stavano a vardar e li butò in Texin, unde el gran maistro li levò de lì et li mandoe a Piasenza. Poi lui relator andò a Milan, vide 400 cavali menati per le artellarie venuti di Franza e di Aste e condussero in Milan boche 18 con san Marco suso et quelle aviò verso Pavia con altri pezi tolti a Milan in tutto 35 in 40, posti sopra nave, e lui udì far la crida di la

liga dil re di Franza con il re d'Ingaltera, e fato festa e trato artellarie in Milan. Item, zonse a Milan el governador di Zenoa e ste 4 zorni poi tornò a Zenoa. Item, zonse a Milan i cariazi dil ducha di Barbon, 22 zorni, e ch' el ducha è a Verzei e aspetasi a Milan senza zente d'arme per restar governador li, in locho dil gran maistro, è andato verso Cremona; e lui relator vide che sopra i cari l'artelarie è conduta a Cremona e li fanti; poi l'andò a Mantoa e vide Lodovico da Fermo capità lì, e non lassono intrar alcun in Mantoa, e si dicea perchè la Signoria volea il marchexe; poi si parti e andò a Cremona vete il gran maistro aloza in castello e ogni di ussiva in la terra e intrò con cavali 300 e stete zorni 5 dito gran maistro lì, poi andò a uno castello di Palavesin, 4 mia lontan di Cremona. Item, intese a Pavia erano zonti 2000 sguizari e voleno far la massa di le zente a Castelnovo, e tutti francesi vano verso Mantoa, se dicea erano lanze 1500 e pedoni 20 milia; la marchesana di Mantoa era a Viadana et havia fato preparar vituarie pan et vin per 10 in 12 milia persone; poi si disse non venia le zente francese per mantoana si non li sguizari e guasconi con l'artellaria e venturieri da 50, summa 5000 pedoni, e fin quel di, a di ..... non erano passati 500 cavali verso Bresello. Item, a Caxal mazor vide 17 barchete de ar- 153 tellarie, over burchiele con le artellarie et parte de li fanti suso, et vide da 25 in 30 barche, è messe in terra sopra i cari le barche, e intese da missier Lodovico Gardan locotenente dil podestà de Viadana e ambasador a Roma per Mantoa ch' el temeva dil mantoan. A Mantoa è zonto domino Galeazo Visconte per asecurar quel stato, e il gran maistro vol le forteze in le man, la marchesana deniega darle e manda a fornir i lochi. Item, vide li 50 fanti a Mantoa mandati è zorni 8. Item, dito domino Galeazo volea il fiol e questo etiam li fo negà, il gran maistro starà a quello castello apresso Cremona, e le artellarie erano a Cremona e a Caxalmazor, el di de la Sensa, erano a Borgoforte stà condute per Po è za 4 dì; se dice el gran maistro esser venuto a Mantoa con 300 cavali quel zorno, e vide venendo zoso per Po cavalchar francesi da 5 in 6 per volta su le rive e venir verso la Stella et Sermede dove feva uno ponte per passar a Castelnuovo, vide 10 in 12 burchiele, e questo fo venere, et 300 guastatori che lavorava, e a Sermene vide 25 in 30 cavali sopra le rive. Item, zonse la sera a Ferara e vide verso el Bondem 200 fanti feraresi e intese sariano 500 venuti, per amor di quelli di Lignago non ruinasse il ponte. Item, li era do galie armate per forza, i capi